



**Republika e Kosovës**  
Republika Kosova – Republic of Kosovo



**Komuna e Mitrovicës së Jugut**  
Opština Juzna Mitrovica – Municipality of Mitrovica South

**KUVENDI I KOMUNËS SË MITROVICËS SË JUGUT**

**Komiteti për Politikë dhe Financa**

**Nr. 02-060/01-0033857-1/25 dt. 19.06.2025**

**Mitrovicë**

**PROCESVERBAL**

**Nga mbledhja e rregullt e Komitetit për Politikë dhe Financa**

**Mbledhja e 42-të**

**Koha:** 19.06.2025 ora 10:00  
**Vendi:** Salla e Mediave  
**Të pranishëm:** Kryesuesja e Kuvendit znj. Vesa Broja  
Anëtarët e Komitetit për Politikë dhe Financa: Fadil Veseli, Nazmije Sejdiu, Vesel Neziri, Hysen Muzliukaj, Erseka Barani, Muhamet Hoti dhe Xhyljeta Imeri  
Kryetari i Komunës z. Bedri Hamza  
Drejtorët e Drejtorive  
**Mungoi:** Shkurta Shosholli Musa

Mbledhjen e hapi dhe kryesoi Kryesuesja e Kuvendit znj. Vesa Broja e cila theksoi se në zbatim të nenit 52, paragrafi 1, të Ligjit Nr. 03/L-040 Për vetëqeverisjen lokale; nenit 11 paragrafët: 1, 2 edhe 5 të Udhëzimit Administrativ (MAPL) Nr. 05/2020 Për procedurën e themelimit, përbërjen dhe kompetencat e Komiteteve të përhershme dhe komiteteve tjera në komunë; nenit 62, të Statutit të Komunës së Mitrovicës; nenit 15, pika 2, të Rregullores Komunale për punën e komiteteve të Kuvendit të Komunës, për sot ka thirrur mbledhjen e 42-të të Komitetit për Politikë dhe Financa, me këtë:

**Rend dite:**

1. Miratimi i procesverbalit nga mbledhja e kaluar
2. Korniza Afatmesme Buxhetore 2026-2028

**Rendi i ditës u miratua unanimit (8-për, 0-kundër dhe 0-abstenime).**

**Pika 1**

**Procesverbali nga mbledhja e kaluar u miratua unanimit (8-për, 0-kundër dhe 0-abstenime).**

## Pika 2

Kryesuesja e Kuvendit para se ta hapë diskutimin lidhur me Kornizën Afatmesme Buxhetore 2026-2028 theksoi se dje gjatë ditës ju ka bashkëngjitur edhe procesverbali i dëgjimit publik që u mbajtë për Kornizën Afatmesme Buxhetore, fillimisht po ia kalojmë fjalën drejtoreshës së DBF-së e pastaj po hapim për diskutim.

Igballe Islami: Përshëndetje për të gjithë të pranishmit, Ministria e Financave ka procesuar Qarkoren Buxhetore 2026-01. Bazuar në totalin e financimit që na është dhënë, kemi përgatitur Kornizën Afatmesme Buxhetore, duke pasur gjithmonë parasysh obligimet kontraktuale dhe të tjera financiare që i ka Komuna e Mitrovicës. Në mbledhjen e kaluar të Komitetit për Politikë dhe Financa kemi shqyrtuar së bashku Draftin Buxhetor. Kemi diskutuar grantet që na janë ndarë nga Komisioni për Ndarjen e Granteve në nivel të Republikës së Kosovës. Gjatë javës së kaluar është mbajtur edhe dëgjimi publik me qytetarët lidhur me draftin e parë të Kornizës Afatmesme Buxhetore, në koordinim me Kryetarin e Komunës dhe drejtorët e drejtorive. Duke pasur parasysh se kemi lëshuar deklaratat e disponueshmërisë për projektet kapitale, të cilat bazohen edhe në parashikimet për dy vitet e ardhshme, kemi vlerësuar se duhet bërë një ndryshim në draftin e parë. Ky ndryshim lidhet me kategorinë e pagave, duke parë trendin e rritjes së pagave nga niveli qendror dhe faktin se shpenzimet që po bart Ligji për rritjen e koeficientit (në vlerën 110 €) nuk mbulohen. Kjo padyshim ka ndikuar në komunën e Mitrovicës dhe në kategorinë e pagave. Ne kemi vendosur që kategoritë ekonomike dhe kapitale të mbeten si në buxhetin aktual, domethënë në vlerë 7.4 milionë €, ndërsa diferencën prej 2.1 milionë € e kemi dedikuar plotësisht kategorisë së pagave. Jemi të vetëdijshëm që Komuna e Mitrovicës ka nevojë për rritje edhe në kategoritë e mallrave dhe shërbimeve, si dhe në kategorinë subvencione, por kemi qenë të limituar dhe detyruar që të mbulojmë pagat për vitin aktual 2026 dhe të mos shkaktojmë probleme në rekrutimin apo ekzekutimin e pagave për punonjësit e administratës së komunës së Mitrovicës. Ky është ndryshimi që po ua pasqyroj edhe përmes tabelës: kategoritë ekonomike vazhdojnë të mbesin të njëjta siç janë në vitin aktual, ndërsa rritja prej 2.1 milionë € i dedikohet plotësisht kategorisë së pagave.

Kryetari i Komunës z. Bedri Hamza: Dëshiroj t'i falënderoj anëtarët e Komitetit për Politikë e Financa, si dhe të gjithë të pranishmit. Singërisht, ju falënderoj për një punë jashtëzakonisht të vlefshme gjatë gjithë këtij mandati. Nuk kam ndonjë lutje tjetër përveç që të gjithë anëtarët e Komitetit për Politikë dhe Financa, po ashtu edhe të Asamblesë, ta aprovonë buxhetin e komunës së Mitrovicës për vitin e ardhshëm. Pavarësisht që është vit zgjedhor, ky buxhet do të mbetet pjesë e mandatit të ardhshëm për t'u ekzekutuar. Nëse dikush që e udhëheq komunën në të ardhmen vlerëson se duhet të bëhen ndryshime, mund t'i bëjë ato në përputhje me ligjet. Por nuk është mirë që Komuna e Mitrovicës të hyjë në vitin zgjedhor pa buxhet të aprovuar, pa buxhet për vitin fiskal që vjen. Po i shohim disa komuna që nuk e kanë aprovuar buxhetin në kohë dhe tash përballen me mungesë të Kuvendit, e kjo po sjell vështirësi të shumta, përfshirë zhvillimet që nuk po bëhen në përputhje me ligjet. Nuk dua të paragjykoj, por hipotetikisht mund të ndodhin probleme. Prandaj, këtë lutje e kam: ta nisim mirë me Kornizën Buxhetore për Mitrovicën, duke pasur parasysh gjendjen aktuale. Buxheti i ri dhe financimi nga niveli qendror kanë ardhur pas regjistrimit të ri të popullsisë. Kjo do të thotë që nuk na ndahet më buxheti si komunë me 72 mijë banorë, por si komunë me 64 mijë banorë, dhe kjo ka ndikuar në financimin lokal nga niveli qendror. Rritja që kemi është simbolike dhe shkon kryesisht për pagat, për shkak edhe të rritjes së tyre. Në të kaluarën, rritja e pagave ka qenë barrë e nivelit qendror, sepse ai ka financuar plotësisht masën e pagave, ndërsa kategoritë tjera kanë mbetur në nivele më të larta. Sipas trendit që po ndjek, pres që këtë vit të kemi një përmbushje, ndoshta edhe tejkalim të planit të të hyrave, dhe sigurisht do të ketë edhe bartje të të hyrave nga ky vit në vitin e ardhshëm. Gjendja financiare është e konsoliduar. Nëse dikush thotë se Komuna e Mitrovicës nuk ka borxh, po, ka borxh, por vetëm nëse nuk i ka plotësuar kushtet ligjore. Çdo faturë që plotëson kushtet ligjore për t'u ekzekutuar, ekzekutohet pa vonesë. Ende vazhdojnë të vijnë urdhëra përmbarimorë, të cilëve po mundohem t'u besoj që janë në fazën përfundimtare. Nuk di se kur do të përfundojnë plotësisht, por edhe pse vazhdojnë, kemi arritur t'i

akomodojmë. Çfarë kanë ndikuar urdhërat përmbartimore? Kanë ndikuar që disa projekte të mos fillojnë, sepse nuk mund të fillosh projektin nëse nuk ke financim, ose nëse dikush ka marrë para përmes vendimit përmbartimor. Kjo ka ndikuar kryesisht në kategorinë kapitale. Është një situatë goxha absurde që komuna paguan dëm pa fajn e vet, sepse kontratat kolektive nuk i ka nënshkruar komuna, ndërsa kur ekzekutohen këto pagesa, thuhet se ka keqklasifikim në buxhet. Por si mund të ketë keqklasifikim kur raporti i auditimit i konsideron këto pagesa? Përmbartimi ekzekutohet pa marrë parasysh organizatën buxhetore; pyetja është vetëm nga do të merren mjetet, nëse nuk deklarohesh brenda një afati të caktuar. Prandaj ju lus që të aprovohet korniza dhe të procedohet në Kuvend. Kufijtë janë këta dhe nuk mund t'i ndryshojmë, pasi Ministria e Financave nuk i pranon shtyrjet e kufijve buxhetorë. Brenda këtyre kufijve mund të diskutojmë për projektet specifike gjatë seancës për buxhet. Unë prapë them se për mua është e sigurt që korniza do të kalojë. Për mua, që jam në përmbajtje të mandatit tim si Kryetar i Komunës, ka qenë nder i veçantë të punoj me ju. Diskutimet kanë qenë konstruktive, me rekomandime dhe propozime të mira, edhe kritikën kur kanë qenë, kanë qenë profesionale dhe në interes të përmbartimit të punës sonë. Prandaj, shpreh mirënjohjen time për ju pa dallim. Ju lus që ta merrni në konsideratë që kur të vijë buxheti në seancën e shtatorit (e di që është kohë fushate dhe do të ketë tensione), na si njerëz me përvojë që duam të shërbejmë qytetit tonë, është mirë të mbajmë parasysh që shumica ka përgjegjësi për të bërë shumicën dhe për të votuar, por gjithashtu edhe propozimet e opozitës duhet të merren në konsideratë. Për të përmbajtur, uroj që të kemi konstituimin e Kuvendit, edhe pse nuk e di si do të shkojë situata. Nëse vazhdon kjo situatë deri në pranverën e vitit të ardhshëm pa konstituim të Kuvendit, bazuar në përvojën e mëparshme, siguroj që vendi në muajin mars do të përballlet me vështirësi të jashtëzakonshme. Buxheti shpenzohet edhe në dy muajt e parë të vitit të ardhshëm, por me muajin e tretë është e domosdoshme të ketë vendim të Kuvendit për zgjatjen e shfrytëzimit të ndarjeve buxhetore, në të kundërt paralizohet pagesa e çdo obligimi, përfshirë paga, pensione dhe obligime të tjera. Megjithatë, para nesh ka kohë dhe unë shpresoj që të gjendet zgjidhje dhe të mos arrijmë në atë situatë. Nuk dua ta besoj që do të ndodhë, por nëse ndodh, ju po ju them me përgjegjësi që është qershor dhe situata do të jetë shumë e vështirë në mars. Prandaj, faleminderit shumë juve, kryesueses dhe të gjithëve. Ju lus që ta votoni Kornizën Buxhetore dhe ta procedojmë në Kuvend. E di që niveli qendror e ka këtë dokument me shumë informues për Kuvendin, nuk është votuar gjithmonë, por është një orientim për buxhetin e tri viteve të ardhshme. Në Kuvend duket se do të votohet, kështu që nuk e shoh si problem këtë çështje.

Hysen Muzliukaj: Përshëndetje të gjithë të pranishëmve. Desha të ndërlidhem me materialin që na e keni sjellë sot, si dhe raportin e dëgjimit publik që na e keni sjellë dhe, ka shpërputhje me atë që u tha në dëgjimin publik, sot kemi një raport tjetër. Proceduralisht, a jemi në rregull sepse kanë lu shifrat, qytetarët kanë pasur disa të dhëna, ndërsa në raportin që kemi tani, shifrat janë tjera. A është kjo në përputhje me procedurat? Unë e di që do të më thoni po, unë do të doja që të ishte një pasqyrë më e saktë dhe më e qartë, edhe për shkak se është fundi i mandatit, por edhe për korrektësi ndaj vetes, ndaj jush edhe me procedurat. Në këtë rast, do të ishte mirë nëse Sekretaria ose dikush tjetër do të na informonte nëse dëgjimi publik është zhvilluar sipas rregullave dhe nëse ka pasur ndonjë ndryshim në materialet e dorëzuara. Sot kemi paraqitjen e kornizës përfundimtare, e di që është në fazën finale, por pa ndryshime të mëdha në tekst.

Kryetari i Komunës z. Bedri Hamza: Z. Muzliukaj, po, ndryshime kanë ndodhur, por dua të theksoj që këto ndryshime kanë ndodhur në dobi të atyre që kanë marrë pjesë në dëgjimin publik. Dëgjimi publik është mbajtur me një masë më të madhe pagash, ndërsa tani një pjesë e kësaj mase është zhvendosur në kategorinë e kapitaleve, çka nënkupton që realisht mund të realizohen më shumë projekte. Ne kemi një numër të konsiderueshëm të pozitave të aprovuara por të paplotësuar. Gjatë asnjë faze të vitit apo mandatit nuk e kemi tejkaluar numrin e lejuar të punësimeve. Thjesht nuk kemi arritur t'i plotësojmë ato vende pune, disa prej tyre ishin të domosdoshme, por për shkak të kufizimeve nuk kemi mundur t'i mbulojmë. Po, janë rritur pagat, por kjo rritje nuk është shoqëruar me rritjen e masës buxhetore për pagat, dhe kjo na ka futur në një deficit. Aktualisht, në

nivel organizativ buxhetor, kemi ndoshta rreth 170–200 pozita të paplotësuara. Kemi marrë edhe shkresë zyrtare nga Thesari, ku kërkohet që të kemi kujdes me rekrutimet për të ruajtur stabilitetin buxhetor. Ne e respektojmë këtë shkresë, sepse është një dokument institucional. Lëvizja që është bërë nga pagat drejt kapitaleve është në përputhje me prioritetet. Po të kishte ndodhur e kundërta, pra zhvendosja nga kapitali në paga, qytetarëve që kanë marrë pjesë në dëgjimin publik do t'u thuhej sot se kanë pas më shumë projekte të planifikuara, e tash më pak. Por në këtë rast, për projektet që kemi diskutuar, jo vetëm që janë aty, por janë shtuar edhe disa. Dhe kjo, në fakt, është pozitive. Dëgjimet publike janë bërë, janë publikuar edhe gjatë fazës së draftimit dhe zhvillimit të buxhetit. Dhe mendoj që jemi në një fazë ku flasim në nivel të kategorive ekonomike. Për projektet specifike – nëse do të jetë një rrugë, një shkollë apo një çerdhe – kjo do të përcaktohet më vonë brenda kategorisë kapitale, sepse ende nuk është specifikuar në detaje. Ajo që po i kërkoj Drejtorisë, gjatë përgatitjes së buxhetit për vitin 2026 dhe për vitet vijuese, është që fillimisht të merren parasysh obligimet ligjore dhe kontratat ekzistuese. Kjo nënkupton që të buxhetohet saktësisht masa e pagave dhe të mbulohen të gjitha kontratat në fuqi. Ka pas raste që kontratat ekzistojnë, por nuk janë buxhetuar mjaftueshëm, dhe kjo krijon hapësirë për projekte të reja që nuk mund të realizohen realisht. Kërkesa ime është që të bëhet përpjekje që mandati i ardhshëm të fillojë me një buxhet të konsoliduar, pa lënë prapa obligime financiare apo kontraktuale. Jo të gjitha kontratat përfundojnë më 31 dhjetor të këtij viti, por ato që janë aktive duhet të buxhetohen 100%. Pastaj, çfarë mbetet si hapësirë, mund të përdoret për projekte të reja. Z. Muzliukaj, besoj që edhe në raport me dëgjimin publik dhe procesverbalin, kjo situatë nuk vendos në pozitë të pafavorshme ata që kanë marrë pjesë në dëgjimin publik. Përkundrazi, ato që janë diskutuar janë të përfshira dhe është shtuar edhe diçka më shumë – dhe kjo është pozitive. Pozitat e paplotësuara të aprovuara nuk kanë gjasa reale të plotësohen në gjashtëmujorin e parë të vitit të ardhshëm, për shkak të procedurave të gjata dhe shpeshherë të ndërlikuara të rekrutimit. Edhe nëse buxhetohen nga janari, realisht pagat fillojnë të merren diku në gjashtëmujorin e dytë. Kështu që nuk e shoh si problematikë. Nëse ka ndonjë paqartësi ose nevojë për sqarim shtesë, unë gjithmonë jam i gatshëm. Ka pasur raste kur i kemi shtyrë pikat edhe për ndonjë mbledhje tjetër, dhe nuk ka pas asnjë problem, sepse kufijtë buxhetorë nuk janë cenuar. Në fund të fundit, qytetarët nuk e matin punën tonë me masa pagash. Ata interesohen për projekte konkrete në terren – rrugë, çerdhe, shkolla, investime kapitale që ndikojnë drejtpërdrejt në jetën e tyre.

Xhyljeta Imeri: Dëshiroj të ngre një çështje që për mua është e rëndësishme. Më intereson të di se sa është dallimi në numrin e stafit mes vitit 2025 dhe 2026. Gjithashtu, më duhet të theksoj se për mua është e papranueshme që për tri vitet e ardhshme të jetë planifikuar i njëjti numër i stafit. E kuptoj që për vitin 2027 dhe 2028 kjo mund të jetë më shumë formale, por nëse kemi për synim hapjen e çerdheve të reja, atëherë automatikisht duhet të parashikojmë edhe rritje të numrit të të punësuarve. Po ashtu, nëse kemi plan të angazhojmë psikologë, asistentë për fëmijët me nevoja të veçanta apo të plotësojmë pozita që kërkohen me hapjen e institucioneve të reja për fëmijët, atëherë besoj që numri i stafit duhet të pasqyrojë këto zhvillime dhe të dallojë nga viti në vit.

Igballe Islami: Unë qëllimisht nuk u lëshova te detajet në qarkoren buxhetore, sepse në mbledhjen e kaluar të KPF-së e kemi shqyrtuar bashkërisht qarkoren, ju kemi njoftuar edhe bashkërisht e kemi diskutuar që edhe grantet janë ndarë sipas formulës së re, domethënë sipas regjistrimit të fundit nga Agjencia e Statistikave të Kosovës dhe unë po pajtohem plotësisht me juve që neve na duhet staf më i madh, pikërisht tek stafi arsimor mirëpo, edhe këtë ua kemi sqaruar gjatë mbledhjes së kaluar të Komitetit për Politikë dhe Financa, ashtu siç ndahet buxheti për kokë banori, ashtu ndahet edhe stafi pikërisht arsimor bazuar në nxënësit të cilët e vijnë mësimin në territorin e Komunës së Mitrovicës. Rrjedhimisht, neve na është ndarë stafi, sepse në qarkoren e parë nuk specifikohet stafi tjetër vetëm ai arsimor, ndërsa është në të njëjtën vlerë, në të njëjtin total siç është në vitin aktual. Ndërsa stafin përfundimisht e dimë sa është, domethënë sa është totali i stafit me qarkoren e dytë, e cila është gjatë muajit gusht, domethënë atëherë kur vjen qarkorja e dytë 2026/02. Kemi nevojë për staf shtesë. Kemi nevojë edhe për shtim të stafit për fëmijët me

asistencë dhe me nevoja të veçanta, mirëpo krejt kjo bazohet domethënë qarkoren buxhetore, ndërsa është Ministria e Financave ajo e cila e përcakton edhe stafin edhe gjitha grantet tjera, Korniza Afatmesme Buxhetore është propozim të cilën ne e dërgojmë në Ministrinë e Financave, ndërsa prapë janë zyrtarët kompetentë, domethënë përgjegjësia mbetet në Ministrinë e Financave dhe lehtësisht këta kufijtë buxhetorë mundën me u ndërruar në kategori ekonomike, njëjtë si presim me pas edhe me stafin. Përfundimisht, sa e kemi stafin të buxhetuar për vitin 2026, bazuar në qarkoren, kështu që gjithçka varet nga ministria dhe nga regjistrimi i fëmijëve në territorin e komunës.

Pasi nuk kishte të lajmëruar tjerë për diskutim, Kryesuesja e vuri në votim Kornizën Afatmesme Buxhetore 2026-2028.

**Komiteti për Politikë dhe Financa miraton unanimitisht (8-për, 0-kundër dhe 0-abstenime) Kornizën Afatmesme Buxhetore 2026-2028 dhe e njëjta i procedohet Kuvendit të Komunës për shqyrtim dhe miratim.**

**Mbledhja përfundoi punimet në ora 10:30 min.**

Mitrovicë

Procesmbajtës:

Afërdita MAXHUNI

Kryesuesja e Kuvendit

Vesa BROJA



